

每週經課朗誦經文(巴克禮台語漢字)2014/07/20

共同經課 - 1 創世記二十八章十節~十九 a 節

10 雅各離開別是巴，向哈蘭去；11 到一所在，因為日落，就佇遐歇暝，對許個石頭的中間提一塊做枕頭，佇遐暝，12 夢見有梯倚佇地裡，梯頂抵天，有上帝的使者佇梯裡啲上落。13 耶和華倚佇梯頂，講：「我是耶和華——你的祖亞伯拉罕的上帝，亦是以撒的上帝；我欲將你現在所暝的地賞賜你及你的後裔。14 你的後裔欲親像地上的土沙，你欲對東西南北來發展；地上萬族欲因為你及你的後裔得著福氣。15 我亦及你佇啲。你無論去叨落，我欲保護你，亦欲導你倒來此所在，攏無放揀你，到我成對你所講的。」16 雅各晒醒，講：「耶和華真正佇遮，我竟然唔知！」17 就驚講：「此所在到即通驚！唔是別項，這是上帝的厝，這是天的門。」18 雅各早早起來，將伊做枕頭的石倚做柱，倒油佇頂面。19 就名彼所在叫伯特利。

共同經課 - 2 詩篇一百三十九篇一節~一十二節，二十三節~二十四節

1 [大衛的詩，交互樂官。] 耶和華啊，你已經鑑察我，識我。2 我坐落去，我緝起來，你攏知；你對遠遠知我的念頭。3 我行路，我倒佇眠床，你攏詳細知；我一切所行的，你也深知。4 耶和華啊，我的嘴所講的話，你無一句唔知。5 你佇我的前後圍我，按手佇我的頂面。6 此款的知识奇妙，我袂會測度，真高，我袂會到。7 我欲去叨落閃避你的神？我欲走去叨落、閃避你的面？8 我若上天，你佇遐；我若暝佇陰間，你亦佇遐。9 我若展開清早的翅，飛到海的極頭來倚起，10 就若佇遐，你的手亦欲引導我；你的正手亦欲牽我。11 我若講：黑暗欲遮蓋我，閣四圍的光欲變做暗暝；12 就黑暗亦袂會遮蓋我，互你無看見，黑暗暝親像日時發光。黑暗及光明，在你看攏是一樣。23 上帝啊，求你鑑察我，知我的心思，試驗我，知我的意思，24 看我有甚麼歹所行無，導我行永活的路。

共同經課 - 3 羅馬書八章十二節~二十五節

12 按呢，兄弟啊，咱唔是欠肉體的債致到照肉體來活。13 因為恁若照肉體來活，就會死；若用神拍死身軀的所做，就會活。14 凡若互上帝的神所導的，是做上帝的子。15 因為恁唔是受著奴僕的神，致到閣驚惶；就是受著設立做子的神，對按呢咱叫講：「阿爸！父啊！」16 聖神家己及咱的神相及干證咱做上帝的子；17 既然做子就做後嗣，就是做上帝的後嗣，及基督同做後嗣。咱若及伊同受苦，是欲互咱及伊同榮光。18 因為我算現時的艱苦袂堪得比並所欲顯明到佇咱的榮光。19 因為受造的物抬頭向望，啲聽候上帝眾子的顯明。20 因為受造的物降服佇空虛，唔是伊甘願，就是對彼個互伊降服的。21 是啲向望連受造的物也欲得著解放脫離敗壞的拘束，來入佇上帝的子兒榮光的自由。22 因為咱知一切受造的物到此時猶啲相及吐氣、苦痛。23 唔若按呢，就咱本身得著聖神頭水的果子的，也心內家己吐氣，啲聽候設立做子，就是咱的身軀的贖回。24 因為咱得救是對向望；若是已經看見的向望唔是向望，因為所看見的甚麼人啲向望伊？25 獨獨咱若向望彼個所無看見的，咱就吞悞聽候。

共同經課 - 4 馬太福音十三章二十四節~三十節，三十六節~四十三節

24 閣設譬喻對in講：「天國親像人撒好種子佇伊的園，25 人暝的時，伊的仇讎來，撒稗佇麥中就去。26 到麥發起來續結穗的時，稗亦出現。27 家主的奴僕來給伊講：『頭家啊，你豈唔是撒好種子佇你的園嗎？對叨落有稗？』28 伊給in講：『這是仇讎做的。』奴僕給伊講：『你愛阮去薙伊嗎？』29 伊就講：『無，驚了恁薙稗，連麥續拔起來。30 容允二項平平大穰，聽候收割。到收割的時，我欲給割的講，代先拾許個稗，繕歸把通燒伊；獨獨麥著收入我的粟倉。』」36 彼時，耶穌互眾人四散，才入厝。伊的學生就近伊，講：「園的稗仔的譬喻給阮解明。」37 伊應講：「撒好種子的是人子；38 園就是世間；好種子的就是天國的子；稗就是歹者的子；39 撒稗的仇讎就是魔鬼；收割的時是世界的路尾；割的就是天使。40 所以親像拾稗仔來用火燒，佇世界的路尾亦欲按呢。41 人子欲差伊的天使對伊的國內收拾見若互人著觸的及做法的，42 穴in佇火爐；佇遐欲有啼哭咬牙切齒。43 彼時，義人欲發出光親像日，佇in的父的國。有耳孔的，著聽！」